



Protocol da la radunanza cumünala dal cumün da Val Müstair

4. radunanza cumünala 2019, dals 27.11.2019, ad uras 20.00, sala da gimnastica a Sta. Maria

Preschaint:

- President: - Rico Lamprecht
- Suprastants: - Gabriella Binkert Becchetti, vicepresidenta
- Aldo Rodigari
- Gian Duri Conrad
- Roman Federspiel
- Daniel Pitsch
- Hansjörg Weber
- Votants: - 27 (partecipaziun da 2.31 %)
- Giasts: - Thorsten Frohn, impiegà da la Biosfera (sainza dret da vuschar)
- S-chüsà: - Cla Filip Pitsch, manader da gestiun dal PEM (amalà)
- Actuar: - Not Manatschal, manader d'administraziun

1. Salüd / glista da tractandas

President Rico driva la radunanza e spordscha il salüd a las 27 votantas e votants e'l giast.

Avant sco inchaminar a l'evasiun da las tractandas giavüscha il president da s'algardar a nossas convaschinas e convaschins chi sun gnüts clamats d'ürant l'on scuors a megladra vita. Quai sun, nomnadaming davo la data dal mortori:

- | | |
|-----------------------------|----------------------------|
| - Hohenegger Jaquen (Jakob) | - Selm-Fritz Anna |
| - Pfeiffer Aldo | - Florin Gian Duri |
| - Jung Peter | - Fliri-Lamprecht Jolanda |
| - Grond Jacob (Jachen) | - Gross Lüzzi |
| - Rascher-Fierer Josefina | - Oswald-Walter Maria |
| - Burkhard-Holinger Christa | - Tschenett Flurin |
| - Bleiker Werner | - Fasser-Hug Alice |
| - Salvett-Lanfranchi Elda | - Bannwart-Schgör Ursulina |

In algordanza ed in onur als trapassats s'alvainta la radunanza da las sopchas.

Da l'otra vart po el eir far l'allegraivla comunicaziun chi ha dat d'ürant quist temp las seguaintas naschentschas:

- | | |
|--------------------------|------------------------------|
| - Stupan Mattia, | figl d'Aita ed Enrico |
| - Hohenegger Alessio, | figl da Angela e da Tino |
| - Schwarz Philipp, | figl da Tanja e da Thomas |
| - Caviezel Attila, | figl da Seraina e d'Armin |
| - Schweizer Elena Aylin, | figlia da Elvira e da Ramun |
| - Wegmann Nia Elena | figlia da Patricia e Patrick |
| - Ruinatscha Luca | figl da Simona e da Jon |
| - Tschenett Nick | figl da Stefanie e da Mirko |
| - Krohn Liv Orlando | figl da Michaela e da Tim |

La glista da tractandas vain preschantada ed acconsentida illa fuorma affischada e protramissa in mincha chasada.

2. Tscherna dals dombravuschs

Sco dombravuschs vegn elet Chasper Stuppan.

3. Approvaziun dal protocol da la radunanza cumünala dals 21.08.2019

Tenor l'art. 29 da la constituziun cumünala sto il protocol da l'ultima radunanza, in quist cas quel dals 21.08.2019, gnir expost per l'invista dals votants almain ün mais davu la radunanza, d'ürant 30 dis, in chasa cumünala. L'exposiziun d'eira publichada illas tablas d'affischa da las singulas fracziuns. Recuors nu sun entrats, uschè cha'l protocol vala sco acceptà.

12 9 FINANZAS ED IMPOSTAS

Approvaziun dal preventiv cumünal per l'on 2020

President Rico prelegia sco introducziun seis preambul, chi fuorma la part introductiva dal preventiv. Quel tuna:

Il preventiv 2020 prevezza darcheu ün considerabel ingaschamaint finanziel dal cumün da Val Müstair. Saja quai sur il quint curraint sco eir sur quel da las investiziuns. Las entradas e sortidas nu sun equilibradas, uschè chi's sto prevezzer d'augmentar il chapital ester.

La suprastanza s'es conscianta cha la situaziun finanziaria dal cumün da Val Müstair es plütost flailva. Causa cha dozar las entradas nun es uschea simpel saran masüras da spargn pel avegnir indispensablas. Pro'l personal daja prosmamaing diversas pensiuns. La dumonda centrala es scha quellas plazzas vegnan rimplazzadas o schi's tira a nüz sinergias internas. Da ponderar esa eir scha tuot il service public po gnir garanti in avegnir sco fin da qua. Ils cuosts dals secturs sandà e social, e las associaziuns cun instituziuns regionalas, chaschunan eir adüna daplü cuosts, sainza cha'l cumün pudess tour influenza directa. Important esa eir da metter intuorn consequaintamaing il plan da master 2025 chi da cun seis progets previs plazzas da lavur ed attira uschè familias giuvnas.

Las entradas / sortidas dal ressort La Sassa han üna grond'influenza sül resultat dal preventiv. Ellas d'eiran fingià büdschetadas dal 2018 e'l 2019. Our da quist motiv s'haja fat quai eir pel 2020. La dumonda da fabrica es i'l fratemp inoltrada. Il plan directiv ed il plan da nüz per il ressort sun fats bun da la regenza.

La suprastanza ha repassà il preventiv in sia sezzüda dals 30.10.2019. Ella propuona d'acconsentir quel sco preschantà.

In seguit preschainta il manader da finanzas Jann Ruinatscha il preventiv cumünal pel on 2020 e da infuormaziuns pro posiziuns specialas, chi divergieschan cun quellas da l'on passà.

Il preventiv muossa il seguaint resultat:

Quint da success

Entradas	fr. 13'634'700.00
Sortidas	<u>fr. 13'809'500.00</u>
Perdita	fr. - 174'800.00

Quint d'investiziun

Entradas	fr. 6'545'500.00
Sortidas	<u>fr. 9'457'000.00</u>
Investiziuns nettas	fr. 2'911'500.00

Cashflow fr. 251'900.00

Deficit da finanziaziun fr. 2'659'600.00

Discussiun / decisiun:

- Mario Gross-Bass constata ün considerabel deficit pro la gestiun forestala. Nos indschegner forestal Livio Conrad conferma cha cul nouv model da quint HRM 2 vegnan ils progets forestals amortisats sur la gestiun forestala. I's tratta quia d'ün import da ca. fr. 200'000.00 chi ingrevi-scha la gestiun. Cul HRM 1 gnivan las amortisaziuns ingrevidas al sector finanzas.

La radunanza accepta il preventiv preschantà sainza cuntravusch.

13 9 FINANZAS ED IMPOSTAS

Fixaziun dal pè d'impostas per l'on 2020

Tenor l'artichel 35 da la constituziun cumünala sto l'otezza dal pè d'impostas gnir confermada d'on in on tras la radunanza cumünala. In vista a las investiziuns chi stan davant porta, e'l deficit da finanziaziun previs, propuona la suprastanza cumünala da laschar il pè d'impostas sün la valur actuala, v.d. süls 120 % da l'imposta chantunala simpla.

Sainza far adöver da la discussiun conferma la radunanza cun unanimità quista proposta.

14 4.00 OSPIDALS

Approvaziun dal preventiv dal center da sandà Val Müstair per l'on 2020

Judith Fasser, administratura dal center da sandà, preschainta il preventiv pella gestiun dal 2020. Pro entradas da fr. 8'334'060.00 (2019 = fr. 8'403'904.00) e sortidas da fr. 9'271'024.00 (2019 = fr. 8'670'313.00) resulta davo la prelevaziun / deposit i'l chapital d'organisaziun ün deficit da fr. 565'216.00 (2019 = fr. 493'561.00). Pro posiziuns chi divergieschan cun quellas dal on passà da ella las infuormaziuns da detagl. Implü da Judith Fasser infuormaziuns generalas sur dal menaschi e'ls sforzs da la cumischiun per generar entradas e diminuir sortidas.

Sainza far adöver da la discussiun accepta la radunanza cun unanimità il preventiv preschantà.

15 8.60 PRODUCZIUN D'ENERGIA

Approvaziun dal preventiv dal PEM per l'on 2020

Siond cha l'administradur dal PEM, Cla Filip Pitsch, s'ha s-chüsà causa malatia preschainta il president da la cumischiun dal PEM, Hansjörg Weber, il preventiv. Tal prevezza sortidas da fr. 4'647'800.00 ed entradas da fr. 3'892'600.00, uschè chi resulta ün deficit da fr. 755'200.00 (preventiv 2019, deficit da fr. 1'610'500.00).

Cun graficas preschainta il president da la cumischiun differentas cifras plü importantas e da infuormaziuns generalas sur dal menaschi. Sco sfida plü gronda pel PEM manzuna el las pretaisas d'istanzas suprieriuras chi ston gnir accumulidas per la strategia federala d'energia 2050 e tuot las investiziuns chi ston gnir fattas per la digitalisaziun e'l provedimaint cun la fibra da vaider.

Sainza far adöver da la discussiun accepta la radunanza cun unanimità il preventiv preschantà.

16 8.40 BIOSFERA - ORGANISAZIUN

Approvaziun dal preventiv dal parc da natüra Biosfera Val Müstair per l'on 2020

David Spinnler, manader da gestiun da la Biosfera, preschainta il preventiv. Las expensas totalas s'amuntan sün fr. 1'496'000.00 e las entradas sün 1'915'000.00. In quist import es cumprais l'import da fr. 350'000.00 chi resulta our da progets na realisats dal 2016 - 2019. Implü conferma el cha cun l'augment da la contribuziun cumünala da fr. 150'000.00 sün fr. 200'000.00 ha eir la confederaziun augmentà seis sustegn da fr. 540'500.00 sün fr. 782'500.00. In detagl declera el in che progets cha l'expensa manzunada vegn investida.

Implü da il manader da gestiun üna prevista sün progets da la perioda 2020 – 2024 ed üna revista sün quai chi'd es gnü fat l'on scuors süls differents secturs sco p.ex.: certificaziun da prodots, chomps da lavur, spüertas da fuormaziun, sensibilisaziun, coordinaziun cultura, senda dal gust, proget da test cun E-Bikes e comunicaziun. Per detagls plü profuonds muossa el via sün la pagina d'internet da la Biosfera, www.biosfera.ch.

Sainza far adöver da la discussiun acceptan ils preschaints cun unanimità il preventiv da la Biosfera pel on 2020.

9. Varia

- President Rico Lamprecht ingrazcha a sia collega ed a seis collegs da la suprastanza per la buna collavuraziun d'ürant l'on scuors. Ün grazcha fich drizza el eir a tuot las impiegadas ed impiegats dal CdVM per lur grond ingaschamaint a bön da nos cumün.
- Livio Conrad, indschegner forestal dal CdVM, conferma cha pervi da la grond cuverta da naiv in noss gods esa fich difficil da schmerdscher ils bös-chins da Nadal. Our da quist motiv vengnan quels retrats quist on da plantaschas certificadas da la Bassa.
- Magister Chasper Stuppan dumonda schi nu's pudess, sco da plü bod, invidar eir als scolars per la racolta dals bös-chins da Nadal. Davart dal forestal vain confermà ch'avant ün pêr ons es quai gnü fat e chi's po ponderar da far quai eir in avegnir.
- Mario Gross-Bass manzuna cha per la sanaziun da la piazza da sport a Tschier d'eira bain büdschetà ün import, cha las lavurs nu sun però amo fattas. In quist'andada fa el ün cumpliment a tuot ils funcziunaris strategics ed operativs dal CdVM per lur grond ingaschamaint a bön da nos cumün.

Ad uras 21.40 po president Rico Lamprecht serrer la radunanza. El ingrazcha per la cumparsa e per l'incletta demuossada. A tuots giavüscha el ün bel e paschaivel temp d'Advent.

Il president:

L'actuar:

.....
Rico Lamprecht

.....
Not Manatschal